

謝龜巢集世皆流傳鈔本惟龜巢稿
藁間有舊刻本近年蕭山人欲購古
籍於正月內某坊揮架中無意得一舊
刻本玄心殊快、頃香嚴書屋有影
寫洪武本想必印從舊刻出也購之
以聊慰宿願 辛巳三月六日蓮夫記

龜巢摘藁敘

毗陵謝先生昔避地吳松之上予適
自燕至吳予友涿郡劉子南氏嘗道先
生姓名學行之懿予願見而未暇焉後
十年識先生之仲子林子崑山則先生
已歸隱於毗陵矣又十年婁東袁子



英氏以先生年八十邀予賦詩為先生
壽繼又告曰先生之門人王著集先生
之詩鋟諸梓先生摘其詩之什一與之
凡若干卷名龜巢摘藁復徵予敘
卷端予辭以未識先生又未嘗閱
先生之詩集何敢率爾從命且衰退

不敏又何能贊一辭於其間哉予言
又豈足為先生軒輊哉然子南既稱
先生於前子英復頌先生於後况
嘗与先生之子林連林累日觀其從容
詩禮秀拔儒林則先生之言行可
知已傳曰不知其人視其友不知其

父視其子又奚必識先生之面誦
先生之詩哉嘗聞先生之為人耿介
尚節義與世寘合其為詩也非有
關於風教者不為也非有得於情之
正者不能也惜先生不少試其才於
時肥遯以終身焉先生有辯惑四卷

行于世皆發先儒所未發其於後學
豈小補哉予姑述所聞者如此先生
名應芳字子蘭號龜巢云時洪武
十二年歲己未七月既望前江浙
儒學副提舉曲豆城始曲豆山人余詮

敘



文章與時高下昔人有是言
也有能處憂患顛沛之中不
為外物之所搖奪形於言辭
無感迫憤懣之病有異於昔
人之言者惟君子為能之吾
於子蒙先生之文見之矣先生

蚤有俊譽嘗為李晉冲俞
用中諸公所知生平重於海
勇於為義袖釋經史作為文
章咸有根柢與人論辨覺
不少休在鄉里時請復鄒忠公
墓寓吳中又請作顧元公廟

世俗怵於異端邪說先生因取經
傳之言作辯惑編以警言之其
襟度磊磊該見雅正實為
士林所推重洪武十年冬先生
之子林以郡府所舉至京師
先生以書德熊曰某有舊作學


子王著於板刻之乃為摘取
十篇以送其請子其序之庶不
為習蒙矣曩先生遊兵時
雖漂搖遂旅中所以至人欽其
道望延致也後巢室松江之
旁講授之暇以詩酒自娛態

托交十五六年一時倡和每揚
維複唐夫似瓚允欽於瑛
中瑛俯仰之間滄海桑壤
先生年逾半百留隱橫山寔
為後進之所景慕其而著述
有不期於傳而自傳者矣王

友中書舍人閩人張至道評
先生之詩雅正純潔法度
整嚴可與傅與厲相伯仲
淺者以為名之態竊窺先生
養之厚氣之充其以子之如
此蓋志聞而樂道之者因以

冠之篇端先生姓河氏自号
龜巢老人故名其集為龜
巢文集云范陽盧熊序





國家圖書館, NATIONAL CENTRAL LIBRARY, TAIWAN, R.O.C.

序

七

龜巢摘藁卷之一

四言

方竹杖

予性喜方偶得一方竹為杖甚愛之因念古之崇
節義尚廉隅者類焉刻詩其端持以自警
倚與竹君易園為方虚心固節悉如其常其方伊何
如玉界尺不砥而平不繩而直曰予老矣賴君扶持
義以方外庶克侶之

上錄囚官

澗水泮泮其類始夷孰恤株連維 皇念茲曰予憲



國家圖書館 NATIONAL CENTRAL LIBRARY, TAIWAN, R.O.C.

臣風紀是任擇賢貳之 皇命是欽繡衣煌煌我厲
有章有秩其儀生人之望相彼園扉胥靡孔多滅耳
弗戒君子謂何國有著令慮讞以時炎風方興輶車
載脂緬惟而初鍛鍊以成文致則有使君明明三木
汝加其隱在予嗟爾長人相彼爰書相彼爰書吏或
竝緣若人何辜冀爾生全既易我心聽以聽汝汝則
吐實曾莫我以獄無大小我必以情匪予汝私 天
子好生 天子好生恩柔爾肌縣象在魏曾汝莫知
明明使君既安且和編人稱平是用作歌

婁曲書堂為殷君叙作

汨彼婁水東連于海爰有幽貞居婁之匯蜚舟岸泊
婁人紛拏幽貞有子幼書厥家晨雞既鳴汎埽室堂
羞我甘輒奉持趨滄我經我史如耕如桑我服其勞
罔敢怠荒黍稌有田魚亦有梁味道之腴游藝之場
曰父與子欣欣樂康其樂維何匪人伊天懂懂往來
誰其語旃

淵明采菊圖

晉室之危一木叵支我思古人孤竹夷齊彼薇西山
我鞠東籬薄言采之可以樂飢秋日淒淒卉木具腓
匪鞠之芳吾將曷歸

竹素齋

天人交敷搃畫馬圖文明九丘科斗六經於昭日星
漆書汗青姬公宣尼斯文緝熙為世範儀百家之多
繼聖惟軻如江如河竹芳素芳文所寓兮開牖戶兮
爾於其中撲斲磨礱德業攸崇苟習其辭舍已弗治
雖多奚為余言苦茲宣弗爾欺亦以自規

江陰張希尹以蚶杯飲予且曰是杯得自句
曲張外史于今三十年請為賦詩

溝南老仙出杯孔竒酌言詢之杯從何來匪兕而觥
匪玉而卮不瑀不鏤不覆不歌謂為蚌邪鵠胡弗持

謂為蛤邪雀奚爾為測海之蠹其殆庶幾老仙笑言
子宜背闖瓦壘之文微蚶而誰水族之秀寔生天池
昔逢羽人觀乃朶頤麴蘖為糧華陽同歸轉客我者
卅年于茲如李白氏杯鸚杓鷓醜風酹月朝斯夕斯
走亦何幸數從宴娛百憂俱忘是用作詩

五言古詩

雜書六首

積陰當玄冬生生已機息陽孳僅毫髮梅花獨先得
若人玩化機於此有深識攀條摘玉蕊吟翫意莫測
誰復見天心所慮群陰逼閉門夫何如君子政夕惕

筑筑保養間茲由見天德

山雲忽低迴四郊紛白雨老農荷鋤歸布穀桑間語
相勸一何勤一鳴再三俯老農感禽意豈憚東作苦
嘉穀既舍活尚待朝日煦小兒未解事大兒遠服賈
農器已可噉鋤耨在梁招入室惟老妻出汲撫甕甌
凜秋氣忽微徂暑已云往黃花異凡木所植本同壤
稜稜清霜間誰復見俯仰肅殺一氣中銳志出其上
彊梁固可人傲德母日長

志士想丘壑老驥馱長道歸來已低迴但覺青山好
至樂在天倫不必事華藻交歡能幾何及今已衰老

至老無脩行善類日已疎生知愧古人宴安夫何如
羣處不念德草草復離居春還有餘興雜花滿郊墟
網罟不能操空羨淵中魚

青陽既開動草木方敷榮積雪忽如此豈不害函生
大化無停機生生寧有已人心偶自徂豈不害天理
援琴一鼓之坐致羸穢除吾身一天地積陰夫何如

感興二首

養竹成大林頻年竹生孫美竹非不多惡竹亦已繁
群奴為洗之往哉聆我言美者慎勿傷去惡必去根
勿虞爾斧缺勿憚爾力煩宿莽蕩無餘清風仍滿園

樹頭鴉舅鳴農人起耘苗問之何爾忙良田莠驕驕
去年耘較遲草蔓人刀寡稂莠非不除卒以害吾稼
吾聞農人語猛省天下事養虎虎害人玩寇亦如此

題金陵陳時舉宅畫壁

雙松歲寒姿卷石太古色我昔南山遊愒此松下石
松華雪霏霏松葉風瑟瑟安知此清景相對復今日
主人罷鳴琴燕坐室生白客來苦炎熱倚樹欲挂幘
不聞天籟鳴但覺空翠滴煩袪頓如洗林壑幽興適
經月數相過明朝又行役黃埃赤日中令人轉相憶

初度

我生何不辰垂白遭亂離鄉城箭滿眼咫尺不得歸
百年今過半朝露能幾時桑蓬負初心蓼莪有餘悲
男兒生無成耆艾將奚為對酒不能飲把劍重歎欬

憶兄

生平愛緇侶逃難亦與俱骨肉不相顧安危竟何如
銅馬西南來殺人血成渠一炬灰萬室九原植含珠
懷哉脊令原何時蓬華居褰裳陟曾巘獨立渺愁予

次韻贈管伯齡

風塵連四海身世等一漚斯文幸未喪同類能相求
嗟爾一片玉產此昆侖丘 天門九重深獻琛亦無

由江村茅屋雨沙田稻花秋門前草不除窓下水長
流時無華子魚幼安誰與儔濯足弄雲水商歌興悠
悠呼兒開晚樽為我解百憂停杯問蒼天兵戈幾時
休金風喜微動火雲未全收谿橋柳陰清繫我三日
舟搽執不忍別相期重來游

倪元鎮過婁江寓舍因借智愚隱遊姜公墩
得如字

秋暑賈餘勇懷抱方焚如故人江上來風雨與之俱
遂令沸羹鼎化為寒露壺幽尋陟崇丘飄飄素霞裾
同遊得名緇吟嘯興不孤大樹倚高蓋小酌歡有餘

三江五湖上群峯開畫圖獨憐我鄉土烟塵尚模糊
安知艱虞世得此暇日娛一笑百慮忘松風奏笙竽

和陳維寅蘇杭懷古各三首

幽尋度香徑遐思倚琴臺烏喙嘗膽日雉妖捧心來
春風煽穠豔滅國輕於埃

馮高望海潮白馬還來無一杯弔忠魂江風為號呼
悲哉抉眼地碧血化苔蕪

丹青讓王宮松栢季子墓黔黎奉丞嘗春秋幾霜露
胡為今之人無復繼高步

寶鼎移炎祚降王赴幽都遂令虎林人斯免馬邑屠

可憐金盃出啼殺稽山鳥

輦路土花碧金門蕊芻關浮海兩龍馬一去不復還
蕭條鳳凰嶺過客忍躋攀

襄樊怕人問威福得專行九重倚師相十年悞蒼生
銅駝臥天街今雨淚縱橫

早春訪鄭明德先生出示沈蘇州近作邀僕

同和

新年到城市憂思喜一雪復覩漢官儀仍書王正月
大邦踰春陵賢守得元結老我愚谿愚無勞捕蛇說
辛至善自錢塘見過賦此為別

黃梅雨兼旬青苔入吾室故人遠方來一笑百憂失
夜坐說艱危聞者皆服栗尚喜戎馬間猶得用儒術
間關脫虎口壯志不少屈歸來西湖上飲水猶食蜜
中吳舊親知生存百無一龜巢酒盈尊聊以永今日
干戈紛滿眼世事暗如漆願言慎所之終焉保貞吉

懷徐伯樞諸友

一昨方臥病妻子呼避兵登舟夜將半骨立心顫驚
問兵今遠近言圍闔閭城賴有風滿帆送我東南征
信宿坐不寐鶴鳴近華亭晚泊青龍江蘆葦匝地青
新知適相遇留我居篠涇土風頗淳朴地僻鷄犬寧

吾病日以瘳客來能送迎老瘦心自憐或謂詩骨清
比鄰兩三家情親若平生園蔬日持送酒壺時共傾
強飲不成歡艱虞未忘情懷哉數君子雨打水上萍
飄零各何許吾將尋舊盟賣刀買黃犢子孫共春耕
柰何西枝西礮石猶雷鳴

淮夷篇

大邦淝河西吳郡稱第一淮夷著柘黃來作豺虎窟
交鄰無善道西顧拒勅敵一鷄嬰罔羅同氣頓蕭瑟
正朔仍奉漢天恩滿林笏賦粟歲倍蕝郿塢金日積
非無舶艖風海運不挂席包藏狼子心反覆莫可測

臺閣兩重臣忍為臬鏡食井鼃自尊大出入復警蹕
愛弟日寵驕開府門列戟提兵幾百萬勢熱手可炙
甲第連青雲圍溷亦丹碧瑤池長夜飲天魔舞傾國
帷幄皆面腴忠鯁即擯斥權門競豪奢婪婪務懷璧
淮南舊巢穴坐視成棄擲出師理侵疆所向輒敗績
鄰兵賈餘勇一舉數州得群兇納降去歛戍獨堅壁
柰何圍數重樓櫓比如擲砲車拂雲漢晝夜飛霹靂
寵弟既齏粉左右皆股栗短兵屢相接苗獠與戮力
南濠百花洲流血水盡赤閉關甫期月人面多菜色
蔬茹猶八珍骸骨爨下析衆叛已不知豕突猶親出

前徒忽投戈回騎不數死一炬齊雲樓紅粉隨烟滅
縛虎送臺城吃哮氣方息嗟哉爾淮夷云命起倉卒衡
行十五載貴富亦已極雕墻底滅亡斯理信弗忒

歸故里

憶昔走避兵棄別鄉井去意將朝莫歸行行重回顧
安知踰一紀方踏去時路四郊皆蔓草白日暝如霧
披榛訪閭里隔水拜丘墓傷哉脊令原黃蒿走狐兔
別墅破垣在郵亭乃新作鄰兒二三輩衡茅書扃戶
初若不相識熟視肖厥父坐久泣且言為我話親故
什九死兵戈餘亡不知處其詞吐未終我淚已如注

對食不能餐相期歸蟻聚吾將語吾兒賣書買農具
歸耕瀟上田宜若烏返哺吾其正丘首此心庶無負

張伯仁被圍蘇城數月而歸詩以為賀

降旗出吳城娃宮劫灰飛布帆喜無恙西風送來歸
桑落酒初熟松江鱸正肥黃花汎清觴高堂舞斑衣
千金誰不有三樂人所希區區燕雀情亦云鄭馬依

贈丹陽孫彥民

讀君吳儂詞如讀春陵篇惜哉未作郡手拍元子肩
衣錦歸何遲研鐵亦欲穿秋蘭抱幽馨奇寶橫道邊
請以白雪曲載理朱絲絃勿謂知者少我心自怡然

逸菴詩為吳子明賦

齋居四壁靜布襪雙鞵青一子能養志百事俱忘情
高年髮不華細字眼猶明谿山隨處嬉杯學常時傾
區區哭窮途笑殺阮步兵

日高三丈餘先生睡初起澗山小湖邊草亭脩竹裏
消搖漉酒巾傲兀燒香几放鶴上晴霄觀魚戲春水
世事了不聞無勞洗吾耳

齊郡張士衡謫居臨濠以媿烏名軒思養親
也既而居吳日以文字為娛名其集曰焦尾
予聞而嘉之作二詩為壽

嗟哉返哺烏穹林故巢傾漂搖風雨餘劬瘁骨肉情
翩翩俛而啄啞啞喜而鳴所啄奚足喜得以飼所生
余昔養親日瞻烏常自懲別來今白首見之雙眼青
匪謂得所止丈人屋晴爍為時巢窺多見烏如閔曾
王孫金彈丸慎勿令畏驚

嗟哉焦尾桐舉世稱竒材鄉非蔡中郎幾作爨下灰
七絃絀朱絲携上高高臺一彈廣陵散絕響有餘哀
箏篳沸新聲瓦釜亦鳴雷麟膠今續絃師襄復歸來
鏘鏘朱鳳吟靈風揚九垓吾方洗吾耳盤石坐莓苔

丘氏節孝詩

君山削蒼珉江水清若空
余妹生其間山水秀所鐘
八鸞鳴蹶里桃李正春風
楚楚繡羅襦娟娟玉芙蓉
蒼黃走烟塵竟作秋霜蓬
浮苴樓海壖賴有良人從
良人遽永訣跪乳遺兩犗
還家依二親親舍四壁空
黽勉薪水役辛勤機杼工
十年守孤鐙朝夕滌瀝供
嫠居親所憐苦志恐莫終
微言示鸞膠慚憤面發紅
鬢髮落霜刃誓言死吳淞
慈親乃噬臍肝膽照秦銅
陵谷聿變改故鄉歸路通
扶携還里居失怙抱哀恫
復為衛土烏埋玉掩斧封
服勤奉慈闈愈久情愈隆
手和熊膽丸課子學業攻
共姜柏舟後志節誰與同

德哉文定公世澤源無窮

祭顧仲瑛詩

嗚呼玉山翁先世吳右族
生逢全盛時當路屢推轂
辭榮樂蕭散竟蘊石中玉
早持萬金產轉手授家督
不為五嶽遊家園蒔花竹
讀書數千卷劬覈明與竺
非無酒如澗過客佳乃肅
徒見駟馬車未若一儒服
緇黃粲然者待遇情亦篤
常言性嗜詩雋永過梁肉
興來抉雲漢毫端注飛瀑
詞林采英華琰刻播芬馥
詩名滿朝野嘯傲心自足
世故一變更十室九顛覆
幽棲綽山下人儼王官谷
時余逃難來顧頽如病鵠

踵門通姓字一見已刮目夜飲嘉樹軒明朝杯又續
高堂桂花秋金釵翦銀燭雙歌掉觥船洗我愁萬斛
一留兩月餘坐客常五六寫圖紀觴詠墜水亦有曲
連床可詩齋清話屢同宿擇鄰局移家歲晚安且燠
柰何鼙鼓聲又若雷震屋婁人悉驚散我亦援夫木
萍漂甫里東賣文如賣卜感翁數相過餽問慰窮蹙
翁亦客攜李遠避賦蛇毒山川鬱相望詩筒時往復
陵谷復一變翁歸理松菊松菊理未能疾藜俄困辱
余舟榻笠澤訪舊宿西塾夜深屏輿隸促首話心腹
春風舊池館荒烟秋草綠 朝廷更化初召役事重穆

挈家赴臨濠星言去程速送行愧鄒游口占謝龜縮
詩去秋復春客來書滿幅念我及兒輩舉室蒙記錄
自言多疾疢經年在牀褥鬱攸屢驚嚇使我長敲棘
尚須手顫定親札寄篇牘安知僅踰月遽余聞不祿
初疑傳者譌細問淚盈掬嗟余老異鄉知己失鮑叔
蕪辭叙疇曩愁吟甚於哭神交死如生歆此杯中醪

吳中行贈方竹杖

往有方竹杖化龍歸混茫吾知龍之靈知我力尚強
今年八十餘舉足勢欲僵一目眇數月白日如昏黃
出門多棘榛况復畏虎狼感君扶持意以杖遠寄將

稜稜七尺觚材拔宛種良孤根斬鐵石老節凌風霜
聳叟性惡圓為尔重激昂氣類喜相得顛危賴周防
秋風黃葉邨春雨烏石岡挂我沽酒錢時與游醉鄉
赤藤有赭色青藜失輝光睹物思故人晤言未渠央

秋晚過太平寺塔所有懷微太古禪老作詩
招之

一昨陵谷變劫灰飛九州太平古招提寶地成荒丘
浮圖端然在氣勢凌高秋風鈴作梵音終日語不休
似言老萬回合為故山留竿木本隨身把茅堪蓋頭
畫沙且成佛况乃願力優老我烟霞夜風流繼前修

天寧寺性天之以同袍有不相能者和韻見
示余乃為之解嘲

道人踞猊床說法如趙州柰何免三窟不與貍一丘
風塵瀕洞餘草木凋零秋法幢扶未起法鼓鳴未休
本來無住著聊尔小淹留祥麟自獨角怪鳥從九頭
正須羣魔伏乃見吾道優釋門第一義坐斷聞思修

簡張希尹

余生寡諧俗老去得知已論交固云晚莫逆良可喜
聯翩諸侯客寂寞著書事夜分青藜光日並烏皮几
幾回論班馬一笑易亥豕烟雲揮洒外風月吟嘯裏

蚺杯酌流霞獸爐蒸沈水佳哉水調詞清我塵俗耳
朱絃聽者希白雪和能幾別來懷盡舊夢見承倒屣
惟林大江邊瓢卷橫山趾秋風響梧葉甘雨熟菘米
相望不三舍相過堪一葦詩筒繼元白通家猶孔李
况於阿戎談亦與諸任齒尚友古之人厥德薰晉鄙
送任叔正御史歸上海

猗歎子任子唾珠腹琅玕一登龍虎榜即著獬廌冠
陞辭蒙主恩家居奉親歡行囊負祿米歸佩紉幽
蘭秋月釣龍江春雲耕鳳山藥壺費長房木榻管幼
安逍遙烏皮几神仙紫金丹為時療民瘼於親駐童

顏葵心抱忠赤萊衣舞爛斑棲遲雲林下放浪湖海
間訪舊過滬浦尋幽出吳關退鷁翅方斂盟鷗心共
閒樂哉壺中天虛白泰宇寬

五言律詩

避雨

繫馬凌亭東題詩野店中長河飛白雨高樹灑清風
州界纔相接鄉音遽不同齊梁陵寢地猶得問樵翁
題杜拾遺像

國破家何在窮途更莫年七歌同谷裏再拜杜鵑前
胡羯長安滿騎驢短褐穿書圖憔悴色猶足見憂天

奉懷京口余主文先生

避地金壇縣懷人鐵甌城蕩烟連北固農晦廢西成
千古江流險諸公地望清無由同晤語白髮鬢邊生

吳下詠懷八首

甬里水東頭垂羅繫客舟客心清似水吟髯白於鷗
詞賦知無用干戈若未休蓬窗三日雨農事憶西疇
五十不富貴蹉跎又六年新愁添鶴髮故國暗狼烟
白帽看雲坐青鐙聽雨眠癡兒書嬾讀翻笑腹便便
吳地方千里齊民總荷戈人生無可奈天運竟如何
米市黃金賤沙場白骨多故山時一望老眼淚縣河

伐木燒官炭中林霹靂飛窮猿無可擇飛鵲更何依
野雨生稊稗山風長歲薇兒曹能采拾猶足慰年饑
吳女何多巧吳趨變楚聲市塵方易肆朱粉復傾城
壓酒桃花鵑彈箏細柳營將軍正年少相顧若為情
闔閭城下柳新種綠陰成樹繫浮江馬枝遷出谷鷲
朝家方用武僧寺總屯兵猶喜湖田熟街頭米價平
盡道從軍好封侯甚不難羽書纔奏捷相府即除官
西日長安遠東風雨雪寒此身知已悞依舊著儒冠
近聞哀痛詔使者又江東兵草何時已車書四海同
落梅春雨後芳草夕陽中欲作菟裘計桃源路不通

送扇趙執中

送子扇一握呼兒寫八分相望湖上宅只隔隴頭雲
南國多秋熱西風有楚氛庭闈清枕席持此奉殷勤

贈道傳上人

偶識廬山遠山莊借客居長餅分臘酒老圃送寒蔬
門俯溪光迴窗含野色虛相過兩不厭燈火案頭書

茅屋

茅屋瀕湖住蕪菁借地栽一秋常苦雨十月屢聞雷
野草青青出寒花處處開埽除蠅蚋跡還有北風來

訪牛彥伊憲史

問訊蛟龍浦來尋鷗鷺盟風雲人躑躅冰雪歲凜
平旦徐徐起清樽細細傾故鄉歸路斷西望若為情

贈章彥復省郎

相約攬秋色重來棧客舟留人十日雨釀酒百花洲
袒漣鞭方著張良箸可籌青山應笑我白首未歸休

次韻荅徐伯樞

寂寞小湖濱逍遙鳥角巾一冬無雨雪四海尚風塵
老健天憐我清貧鬼笑人扁舟乘逸興來往莫辭頻
萬壽寺愚隱師退居上海以苔脯見貽作此

代簡

白足來村曠清風生薜蘿遠分苔脯供傳誦草菴歌
海上邊聲遠山中勝事多送迎門不出柰爾懶融何

遷居

多難居頻徙幽懷孰與論崑山一舍地溘浦數家邨
老去仍為客朝來又抱孫雨餘春韭綠生意滿東園

九日二首

去年重九日烽火接三州黃菊無心看青山滿眼愁
風霜新鶴髮塵土舊貂裘為覓桃源路擘舟到海頭
今年重九日兵破闔閭城紅粉娃宮燬黃金郿塢傾
物情多反覆歸思轉縱橫賴有麴尊酒開軒對晚晴

哭杜玉泉二首

每憶城南杜今為地下郎湛詩名籍籍結客度汪汪
一劍千金直雙樓萬卷香傷春思無限吹笛過山陽
東郭溪山勝南園花竹深平生多樂事之死遂閒心
挂我客中劍撫君床上琴迴風吹柳絮和淚灑衣襟

世亂

世亂一如此年饑更柰何城池百戰後風雨半年多
有酒誰同喫耽詩病亦哦憂懷聊自釋衰鬢未全皤

遣悶

乾坤如許大老病此江濱無酒可留客青山應笑人

幅中方竹杖芳草落花茵賣得長門賦相如未是貧

東郭草堂六首

行盡難行路言歸父母邦瓜田近城郭茅屋小軒窗
教子知一二抱孫成兩雙壟頭耕且饁竊比鹿門龐
淨掃蕭齋地書床一舊氈談經鷄亦解迎客犬常先
流水柴門外橫山瓦牖前春秋垂八十食粥了餘年
延陵耕稼地識字老農家野飯常留客村醪頗勝茶
盈虛天已定貧病我何嗟白鳥知人意朝來集釣沙
過客應相笑衰翁未得閒茶經方補註詩藁又重刪
一帶門前水三峯湖上山興來吟嘯處渾在畫圖間

桑海瀕東變萍蹤十五霜親朋皆鬼錄鄰里似他鄉
劔井光何在金鐘字亦亡山陽誰弄笛時為一霑裳
梅花清似我茅屋小如船臘月無多日春風又一年
儘添頭上雪聊適瓮中天四壁題詩遍陶然枕麴眠

寄吳中行

老我誰知已端人最憶君常持無鬼論不作送窮文
藥杵三更月菜衣五色雲疾藜方滿地蘭茝自幽芬

趙貞白先生輓辭

前代衣冠族先生山澤臞淳風敦薄俗高誼藹中吳
舊債焚餘券凶年賑餓夫市朝無足跡霜雪滿髭須

落落千金盡哀哀二子孤蹇余牛馬走愛爾鳳凰雛
卜宅來依倚通家學步趨玉枝渾不汗瑤草遽成枯
敬下墳前馬仍瞻屋上烏典刑無復見清淚落鮫珠

贈薛朝陽宗師二十韻

論道清寧日承恩紫極天星言辭輦轂雲臥樂林泉
虎衛燒丹室龍耕種玉田居山間宰相行地活神仙
清問時猶及玄談世所傳春秋今近百弟子動成千
妙道傳闕尹高風比偓佺蓬萊方丈外磧奧澗湖邊
庭植三花盛樓居萬竹連玉桃紅綻雨瑤草碧生烟
麟脯供仙饌鸚杯舞醉筵雲璈諧律呂霞袂舞褊褰

福地風塵遠壺天日月縣目光方炯炯眉壽正繇繇
老我頭垂白尋師志在玄漂零隨斷梗衣被集群荃
前度圯橋履重來笠澤船山靈曾有約石髓未應堅
析理秋毫末研幾太極先黍珠當一照光彩徹天淵

送虞士常歸閩中

卓犖青雲器淒涼白雨秋棄官辭傳舍舁疾上歸舟
岸有吟蛩送檣無語燕留七閩天杳杳兩淞水悠悠
親舍孤雲影山城近海頭倚門勞遠望脫屣得長休
金榜聲名在斑衣志願酌猗蘭重製曲緩草足忘憂
已放籠中鶴聊隨水上鷗中心能自足外物更何求

老我三家墅，憐君百尺樓。相知稱鮑叔，遠送媿鄒游。
風土宜丹荔，家居儗素侯。虞卿多著述，能寄故人不。

送陶孝思赴台

夙學多才思，崇文際盛時。鶚書騰日下，鵬奮出天
池。發軔青雲路，承恩白玉墀。泥塗龜曳久，阿閣鳳
巢宜。繩準持三尺，絲毫畏四知。佩韋遵古訓，介石蹈
良規。比德芸暉草，同誠向日葵。徃哉行所學，動必慎
其儀。器作璫璣美，文成黼黻奇。遺芳流汗竹，無負故人期。

卷之一



龜巢摘彙卷之二

七言古詩

嚴將軍戰馬歌并序

至正乙未春浙東宣慰司元帥嚴公某統兵捕寇
過浙西秋八月兵駐烈塘一日遣兵擣禾富莊賊
巢失一騎士既而賊乘馬出拒其馬望官軍來奔
賊墜地馬蹶殺之賊衆驚潰官軍大捷以馬詣帳
前白事時予適在公座中間而喜之故有是作
將軍武惠之嫡孫帳前甲騎多如雲一驪偶爾隨賊
窟背馱賊渠來榮勲沫流兩吻噴白雪光燦雙瞳夾

經月雷奔電激烟霧隨望我旌旗馳踣鉄渠方命墮
鉄蒺藜驪 蹠之成粉齏賊曹瓦解爭納款我軍凱
歌歸馬嘶古來良驥稱有德未有驍騰能殺賊呂家
赤兔項家騅骨朽猶當有慙色將軍報 國秉精忠
安知馬亦肝膽同宅年太史作佳傳宜亦牽聯書乃
功

感賦

吳姬手執金巨羅春風笑面生紅渦主人留客長夜
飲客拜主人辭酒多主人爛醉客亦醉客散扶歸主
人睡殘杯冷炙厨頭傾鄰家兒有啼飢聲

西湖曲

西湖春水綠於酒西湖女兒嬌似柳依稀二月三月
春攀折千人萬人手我有一索青銅錢明朝亦買下
湖船試歌斷臂孤兒曲湖上豈無人解傳

聽雨

客來惟林候漁父蠶舍坐聽三日雨諸生讀書喧兩
廡商羊飛來立當宇雨聲書聲襍蛙鼓蚓歌侶亦諧
官呂青苔上階菌生柱敗壁淋漓籀文古齋僮不敢
開牖戶風撼庭柯嘯飢虎南山石爛成糞土天漏誰
能為天補去年旱魃走吳楚田家什九悲漁釜麥秋

一飽方自許莫教又作飛蛾舞

無錫書所見

丞相樓船槌大鼓鉄騎前驅猛於虎何物鼠輩敢跳梁不畏輕遭萬鈞弩落日未落懸林梢一天殺氣風蕭騷官軍縱火鼠入窟太湖水闊陽山高相君名位同裴度豈無將軍如李愬兜鍪戴雪擣賊巢一夕湖船可飛渡我有方寸鉄願作將軍箭將軍三箭定陽山湖水依然淨如練

右箭頭歌

吳人開渠自望亭通曹湖多得石箭頭長洲徐伯

昂持以見遺請為賦詩

南山爛盡蒼雲根飄風勢欲傾崑崙老砮作鏃幾千載神鏡鬼削秋無痕沈沙不隨戈戟折太陰玄精壯冰結五丁手抉出重泉猶帶堯時九鳥血鶴鷄驚破膽魍魎走折足獨有老於菟坐嘯風滿谷猿臂將軍骨已枯蒼頭廬兒金僕姑時乎時乎柰爾砮

雲文閣為鄒伯常賦

光範門前人似蟻君獨幽棲徵不起西窓拄頰看青山東閣垂簾蕪沈水非烟非霧非霞氛欲斷復續何氤氳若有龍眠博山底海嶽清氣噓成雲香凝燕寢

清晝寂庭竹森如列脩戟白衣蒼狗從變改天上人
間迴相隔咄哉權門銅臭兒臍燈將然恬不知何當
招之入爾室三熏三沐聆吾詩

至正丁酉冬崑山顧仲英會客芝雲堂適時
貴自海上來以黃甘遺之仲英分餉坐客喜
而有詩屬予及陸良貴袁子英等六客同賦

赤眉橫行食人肉逃我崑山采黃獨上書不伏光範
門忍飢寧負將軍腹玉山燕客客滿堂黃甘新帶永
嘉霜分金四座炫人眼漱玉三燕清詩賜山中柳瓢
大如斗吳姬辟手來薦春酒酒酣遙指洞庭山為問木

奴曾貢不頻年兩浙阻兵戈黃甘陸吉不相過此時
共食此佳果胡不取醉花前歌願言海內無征戰漢
廷還有傳甘宴白髮吳儂能上天野芹亦獻蓬萊殿

烈婦歌有序

婦周氏吳郡太滄人至正丙申其父以義兵元帥
貪暴將殺之謀泄而舉家被害帥之子悅婦少艾
誘為妾不從痛罵而死鄉人義而哀之為之構祠
立碑會稽楊公廉夫為文且屬江西陳季子索詩
以著其事

陳君手持烈婦碑勸我為作烈婦歌人生自古孰無

死烈婦之死名不磨本是東滄小家女粉黛不施眉
自嫵父憐母惜忍違離納壻於家半年許阿耶從軍
氣頗麤欲殺不義奔京都手持芒刃機不密身落禍
阮家乃屠繡衣郎君元帥子少年絕愛傾城美願言
携手與同歸即免梟首尸諸市郎君滿屋堆黃金安
知難買烈婦心耳邊言逐飄風過腹內怨含滄海深
罵聲不絕郎君怒馬上揮刀斫頭去雙鸞羞覩青銅
鏡全家甘赴黃泉路娟娟肌體嬌如雪烈烈肝腸堅
似鐵一團冤血注婁江至今流水聲嗚咽男兒讀書
峩冠巾偷生或忍忘君親奴顏婢郝曳朱紫得不愧

此袁釵人嗚呼得不愧此袁釵人

和顧仲英金粟塚燕集

我昔過北邙立馬山之隈為問隴頭樹皆云後人栽
生前尊酒誰不有無人到此自對青山開屋堆黃金
五侯貴難免白骨生蒼苔道傍多棄夜光璧爨下誰
惜絲桐材玉山先生遠觀者曾次不著閒悲哀清秋
携客墳上飲麴車載酒山童推大笑胥魂乘白馬深
慚絲魄化黃能墓銘自製詩自輓視身不翅輕於埃
鶴群長繞嘉樹舞龜趺並載穹碑來鸞翔鳳翥玉箸
篆虎踞龍蟠金粟堆長吟復短吟此興何悠哉秋風

無情摧萬物芙蓉亦老胭脂笑言他年翁仲共寂寞何如此時賓客相追陪功名本愁根富貴真禍胎百年能幾日一日能幾杯從茲秉燭長夜飲猶恐四蛇二鼠忙相催主人沈醉客亦醉絕倒不顧旁人咍北望中州數千里人家盡作兵前灰鬪髻委荒郊孰辨賢與才伯夷空忍首陽餓屈原徒作湘江累神仙初無不死藥方士浪說尋蓬萊君不見無邊之海白淼淼無名之山青巍巍長鯨噓吸成風雷徐市一去何曾迴

盧尹宜興秩滿以兵亂久寓無錫今知

崑山州與予叙舊言懷良有感慨作二詩貽之我思陽羨茶初生如粟粒州人歲入貢雷霆未驚蟄天荒地老今十年春歸又聞啼杜鵑山中靈草化榛棘白蛇何處藏蜿蜒玉川先生一寸鐵欲剗妖墓救明月丹霄路斷肝腸熱還憶茶甌飲冰雪我思惠山泉泠然響鳴琴餅餌走千里者茗清人心向來劫火炎錫谷神焦鬼爛猿猴哭池邊楠石亦灰飛此水依然瀉寒玉若人飲泉五六年一襟清氣清於泉好為吳儂洗煩熱乘風歸報蓬萊仙

贈楊君濟縣丞

我昔崑山鉏白雲高軒訪我麋鹿群我今長洲釣明月君復過此寂寞濱感君相知式相好與君談笑開懷抱坐分半席白鷗沙滿目青山淨如埽社公雨晴風不作邗北邗南花自落勸農來往落花間鷄犬不驚田舍樂君歸哦松坐松陰我舟更入菰蒲深釣鉤無餌勿語人但說烟波無處尋

古鼎歌

蘇州萬壽寺舊歲古銅得識者奇之其識有周康穆宮冊錫冢用鄭伯姬等語大德中任陽謝氏嘗欲以玉栝易之時住山默翁師不從後謝氏為構

佛殿乃予之至正丙申謝遭兵鼎因失去甲辰夏四月愚隱智公復得於軍人之手者舊聚觀皆曰我山中故物也既而出得見示并述其由索詩以紀之

碧雲師著金伽黎空王殿前龍象隨當階一卒送古鼎狀若獻寶波斯兒群緇聚觀方丈室中有老僧前致詞云是山中舊時物立誦窾識能無遺文詞詰屈錯盤詰字體隱伏蟠蛟螭蒼姬訖錄世屢改不知何代來於斯謝家寶樹修佛刹巨構賈與秦城齊鼎兮鼎兮什襲去歲經六紀今來歸師聞此語重歎息兵

火連年炎九域金鐘大鑪棄道傍總若沈沙銷折戟
鼎歸禪月獨無恙護持信有天龍力摩挲兩銜濕烟
霧錯落丹砂映金碧光如摩尼含五色高比珊瑚長
一尺嗚呼羲軒之鼎莫可求禹鼎亦已淪東周世所
用者非爾儔或膨豕腹徒包羞調羹爾無與覆餗爾
不憂歸來兮歸來北山兮菟裘汾陰自有為時出切
莫放光驚斗牛

具區耕隱歌為盛徵士作

脫屣東華塵結廬太湖濱蓬萊開卜徑桑麻接比鄰
金門玉堂夢不到烟蓑雨笠情相親東風二月桃花

雨布谷飛來向人語一犁初破隴頭春黃犢出欄健
如虎西山不知誰采薇南山不知誰采芝我耕我田
食我粟歲晚復有冰壺壑悲歌笑寗戚夜半猶未已
人間閒是非何用污牛耳綠陰繫牛春晝閑樵童隨
我看青山日暮歸來一壺酒牛棘花前開笑口笑問
儂家子若孫知我犁鋤佳趣否豈不見蘇秦為無二
頃田六印纍纍苦奔走到落禍阨虛名何足取鹿
門龐真我友

莫春陪周明府過顧將軍祠下立碑

黃天蕩上將軍樹樹下數家人姓顧行人遙指若堂

封往事猶論麾扇渡新祠畫藻烟霧濕古木垂羅鬼
神護長洲縣令枉高蓋短褐巢翁曳雙屨海棠正落
胭脂雪山餅為酌金盤露柱頭老鶴作人語道旁馴
雉隨車駐吳趨一曲歌未了蜀魄數聲春又莫金戈
鏃馬尚酣戰白羽清風復誰觀看碑莫恠客如雲彼
君子兮真可慕

江貫道清江汎月圖

吾聞老郭之傳許與江山水絕筆稱無雙此圖夜景
江所作彷彿秋聲動林壑長江澄澄月在水遠山蒼
蒼樹如蟻如此江山夜放舟若人真是逍遙游爾來

一百四十載陵谷變遷圖畫在世無蘇李兩詩仙赤
壁采石俱蕭然老夫此興固不少解表亦足醅清醪
出門有礙行且休不如燒香看畫樓上頭

贈製筆王世超

時方用武我業儒超也賣筆來我廬曰予製筆似輪
扁妙不能言徒歎吁宣城阻兵十三載猶喜山中老
斂在拔來紫穎帶秋霜製得筆成時世改鄉年草創
供玉堂玉堂仙人雲錦裳三縑一字不易得筆價亦
與時俱昂莫怪年來棄如土掃除風塵必斤斧爾今
賣筆我賣文何異適越資章甫呼兒為我買一束亟

用寫成懷古錄一書永字三歎賞八法以之隨意足
我有佳音語爾知用筆將見文明時諸公筆諫佐明
主老我筆耕箋古詩詩成未若相如倦毛穎更須重
作傳牽聯為爾書姓名雪上谿山亦蔥蒨中秋適逢
酒禁開椰瓢酌我新綠醅酒酣仰眎月中兔長嘯一
聲歸去來

上元夜雪

此夕何夕方春熙天公降雪風作威大如鸞鶴小鷗
鷺紛然來我階庭飛書帷起坐驚且喜窗隙壁鏗皆
珠璣鄰家兒女笑相語殘燈暗月猶爭輝須臾人靜

燈燭滅失却姮娥爛銀闕想像庖犧世代前元氣鴻
蒙未分別平淮不知誰奏功牧羝或有人持節只愁
壓倒湖上山連我龜巢化魚鼈老龜縮頸牛衣中牛
衣冷與冰鐵同猶喜金烏兩翅凍不折天明飛出扶
桑東羲和之車駕燭龍萬國一照春融融愁懷乃與
雪俱釋青山依舊撐虛空

傷田家寫呈梅州判

花朝一雨連寒食水沒吳田深數尺田家兒女多流
亡操壺半作溝中瘠農官令下星火飛勸農踏車農
苦飢產龜破龜薪炭多溪毛之烹襍鳧茨瘦妻弱子

狀如鬼兩足胼胝背鞭箠樹頭鶉鳩啼惡聲猶恐天
瓢傾未已我謂爾農毋怨天堯田水溢曾九年但有
人能拯飢溺即令四海無顛連請君試聽踏車鼓逢
逢聲中含疾苦天門九重路脩阻此聲何由徹 明主

宜山謠 并序

洪武初 朝廷以南丹諸州民獠襟居素號難治
置安撫司蒞之山東尹公克昌以幕僚建安邊十
策且力為已任尸位者忌其才嫉其功乃毀諸當
路由是調武進縣主簿時予遊 京師遇宜山縣
人以其事語予甚詳且求為之紀述予以公在吾

邑尉有能聲信其人之言不誣也於是撫其事之
大者為作宜山謠六篇

其一苗獠地連交趾叛服不常公言諸方
伯結以恩信咸籍為民且為除其凶號群
獠帖然人悅之作椎結舞

椎結舞擊銅鼓淺蠻生蠻皆按堵賣刀買鉏犁衙
恩人鳥語獷俗馴惡名去豈弟君子民父母

其二沿邊舊置十五屯以獠為長然負固
而陸梁數為民害今罷之民乃安作除虎
窟

除虎窟虎皆散亡龍睡月湖南海北廣西東青草如
今無白骨無白骨人何憂每每舊屯田年年稻花秋
我所思兮龍江水流

其三兵後歲饑公建言發官廩假貸活數
萬人民德之作枯桑

枯桑枯桑徒為我薪煮石弗糜身以食人廩發於官
我命乃續誰其主之伊人如玉伊人如玉孚及豚魚
詔我婦子償粟勿渝厥粟固償厥德靡忘我懷伊人
于羨于墻

其四覃國大韋仲海等十餘家世為土豪

與谿蠻峒獠相表裏為害不一公以計除
之民大快作霹靂斧

霹靂斧行天誅百靈奔走群醜除磔梟獍醢猱招
徠角觶舞騶虞日月兩山明畏境成康衢

其五沿邊蠻獠稅久弗供而良民苦其重
歛今均之視前賦減半思不能忘作生子
以尹名

生子以尹名有田須力耕昔憂公租重今喜公租輕
百年覆盆下一旦白日明斯恩怨或忘生子以尹名
其六革命之初公以安邊事宜屢白省府

民懷之作鞍馬勞

鞍馬勞肉消辭廣西一去二千里借箸籌邊丞相喜
兩年單騎八徃回青草黃茅瘴烟裏鞍馬勞有如此
不市恩不掠羨一寸忠丹報 天子

送江西住上人兵後尋叔父歸養

青年未焚紫羅囊竹林之遊鷓鳳翔一旦身為苾芻
草半間屋住菩提場安知兵甲十五霜遂令叔姪如
參商桑田未變家已破蒲履欲織親俱亡某丘某水
總淪沒曰祖曰禰誰烝嘗象龍荷法力雖猛豺獾報
本情難忘崎嶇行脚訪諸父殷勤稽首祈空王護身

符出虎牢險忍辱鎧染狼烟黃長洲茂苑久爭戰殘
山剩水含悲傷相逢不覺開口笑此喜似得安心方
行人嗟歎擁長道畫鷁送將歸故鄉孤雲飛處是玉
筍把茅蓋頭猶錦堂蒲羞可作潢潦薦木瓢共飲曹
谿香式親諸公發歌詠俱以孝道多揄揚惜哉僧中
有此郎無人能為加冠裳

戲綵堂

宜興主簿許克敬念曾祖法曹公為堂奉母夫人
馬氏相國馬公廷鸞為大書戲綵二字名之至乃
翁復巨構以奉其母今克敬念斯堂與親俱亡哀

思有詩且持卷以求紀載按許氏家譜自南唐金
紫光祿以下擢科第者三十餘人克敬亦洪武進士
南唐故家世軒冕歲久雲仍益蕃衍樂平山中戲綵
堂碧梧鈞翰擣華扁當年甲第連青雲過庭趨踞俱
鳳麟二母高年俱近百兩朝紫誥金花新累袂列鼎
鳴鐘鼓綵衣褊褊堂上舞架書連屋笏滿牀折桂多
從廣寒府昨來海變桑田日四海狼烟暗如漆山中
舊宅化焦土孤兒歸來淚如雨八珍之味肉臺盤何
如啜菽盡親懽千金之裘走南北曷若斑衣戲親側
肯堂肯構固不難去家千里方居官出門羞見羔跪

乳故篋尚餘熊膽丸老夫知公念親意不為高堂燕
安計願言長佩蓼莪詩圭爵榮親繼先世

金牛臺詩送陳仲野

清明雨晴花正開折花送客金牛臺金牛遺跡不復
見但見塵埃野馬去復來臺前鶴溪貫洮瀕湖綠
野平如席臺後群山倚大江齊梁故里迷榛棘登高
望遠散離憂超然如在崑崙丘為問堰頭楊柳樹頗
曾見有此客否五年參贊二千石飲冰食檠持三尺
簿書肯縈游刃餘白雪調高人共惜樓船滌流出京
口閘官放水蛟鱓吼青落絕壁為留題名與此臺俱

不朽

洪武十年五月偕江陰張希尹惠可及等祭鄒忠公墓即事口占獻郡守番禺張侯

青山門外羊腸路走謁道鄉夫子墓向來滄海變桑田
田翁仲漂零竟何處麗牲之碑高十尺顏若銅馳臥
荆棘牧童敲火未足悲正恐瓜分擣衣石使君五馬
來何時摩挲細看黃絹辭五丁一呼為扶起隴頭草
木皆光輝予方與客酌清醕白鶴飛來作人語使君
應表鄭公鄉專美那容孔文舉

七月初張侯遣屬掾詣鄒墓扶植仆碑添土

舊封十月朔率僚佐祭埽且云將伐石以立墓表時應芳與希尹陪拜復有是作

世無文潞公誰立明道表明道表不立斯文尚幽眇
時無孔北海孰稱通德門通德門不稱大儒曷推尊
古人今人同此心當風正欲披其襟嗟予東家子鄒
子傳道龍門天下士一朝叩天關獨立批龍鱗祗恐
綠衣黃裳誤人主安知炎烟瘴雨危其身萬里投荒
挺霜竹歸來青山竟藓玉迄今三百九十年陵谷幾
番經變遷折角麒麟臥榛棘復見藩侯駐熊軾鬣封
添覆烏銜土頽碑扶起龜趺石先生九京知不知名

在人間益輝赫孔北海文潞公今人古人將無同青
天高高不可問白楊為我噉西風

贈刊字者

憶昔趙文敏公之寫天下碑鐫字獨稱茅紹之紹之
之妙在何許八法靡有秋毫遺嗟哉文敏不同世抱
藝如茅誰品第斬蛟橋谿水清鐵筆淬來鋒甚銳篆
隸真行章草書銀鈎鐵畫寫璠璣天然筋骨見顏柳
假手補戈真是虞文章太守眼如電語重兼金數稱
羨青年正可為時出山居聽泉何足戀群公將勒燕
然銘中即要令傳石經老夫為爾雙眼青鍊筆于今

錚有聲

兵後過季子祠

延陵采地荒榛棘延陵遺廟成瓦礫延陵野老歸弔
古獨立斜陽長太息塵埃野馬紛滿眼城郭人民總
非昔共惟秦伯吳鼻祖三讓高風冠千古周衰列國
俱戰爭卓爾雲仍踵遐武去國躬耕江上田曰附子
臧非浪語天倫義重情所鍾屹立狂瀾見孤柱此義
孰可比采薇西山孤竹子此情知者誰獲麟老筆十
字碑德音寥寥二千載陵谷幾番經變改江南近代
淫祠多梁公不作可柰何於乎祠堂之毀還可屋禮



龜巢摘稟卷之二

國家圖書館, NATIONAL CENTRAL LIBRARY, TAIWAN, R.O.C.

讓風衰較難復漢家兄弟歌布粟唐家兄弟相屠戮
何當大化一轉轂於變澆漓作醇俗九州八荒春穆
穆泰伯延陵斷絃續芳也未死當刮目

龜巢摘稟卷之三

七言律詩

酬金子元御史惠西洋布時寓黃州

十月北風方怒號，一端西布比綈袍。
絨書來自黃泥坂，織作誰將白鳳毛。
田舍不憂空杼柚，海圖無用折波濤。
室人早起寒窗下，含笑細歲落剪刀。

題錢拱之幽居吳越王世裔名環

門前車蓋去何忙，林下琴樽日自長。
杜甫苦吟頭戴笠，管寧危坐膝穿牀。
舊家錦樹成春夢，老圃黃花有晚香。
養鶴籠開巢燕別，一簾疎雨午風涼。

國家圖書館, NATIONAL CENTRAL LIBRARY, TAIWAN, R.O.C.

中秋邀高則誠趙君模小酌

一違言笑遽數月百年游從能幾迴逢人為說烏寶
傳此客合貯黃金臺林頭瓦瓮酒初熟窗下木犀花
正開知微愛月興不淺連璧為我乘風來

奉同于尚書賀高太尉承恩詩

紫鳳銜書下日邊玉樽金幣禮高年天恩已見
來三錫月俸猶供食萬錢綠野午橋間几杖長洲茂
苑好山川舊家池館花如錦簫鼓春風送酒船

楊鐵厓為作思賢錄序又以予上書丞相府
不報賦詩贈行故留此奉別兼謝

錢塘江上久為客光範門前徒上書喜得問奇揚子
宅不慚題柱馬卿車風塵瀕洞人多恐冰雪崢嶸歲
又除什襲驪珠三百顆橫山歸臥舊田廬

馬仲達省郎招飲出示石處道丘長卿等西
湖倡和之什乃即席次韻以寓感慨

西湖山色冷如友前度劉郎兵後來紅粉畫船俱寂
寞斷橋流水自縈迴一堤寒柳風烟老兩鬢秋蓬歲
月催賴有故人能慰藉綠尊重對晚山開

題瘦馬圖

將軍百戰自封侯老病誰憐玉腕騮皮肉瘦來渾見

骨精神減盡只垂頭長鳴落日青山下獨立西風白
草秋猶勝駱駝三萬匹盡隨兵甲死炎州

哭全御史

早乘驄馬出三臺金殿香携兩袖來獨立敢言天下
事實封長到御前開潼川風雨霑歸袂赤壁江山
落酒杯車笠不同肝膽合舊書重覽不勝哀

過鴻山訪孟伯堅周履道不遇

班馬文章駕並馳雲龍追逐去何之門前流水垂楊
柳屋上青山敷子規三月又逢脩禊日一觴還憶太
平時可憐潦倒無家客滿目風塵兩鬢絲

潭

元夕

去年早春風雪繁上書論兵紫微垣單車不畏九折
坂寸膠欲澄千丈潭適越無人用章甫避秦何處覓
桃源堠山西畔孤村裏借屋篝燈過上元

陳澹翁宿堠山客舍翁名師可字伯大号澹齋宋德祐常州通判之

外家親戚惟翁在相見猶能話阿孃三夜客窓同寂
寞兩年兵火各流離可憐今雨逢窮客誰識前朝郡
倅兒先世青氈零落盡行囊留得數篇詩

聞鄉信

鄰舍驚呼避蝮蛇老妻嗔怒唾烏鴉誰知昨夜三更
雨又送春風一度花寒食清明人上塚夕陽芳草客
思家愁來復遶青山去何處壚亭酒可賒

聞陳天倪陳心遠避兵洞庭山寄此代簡

松喬一別兩經年問訊曾逢賣橘船湖上白鷗堪結
社山中朱果不論錢仙家犬吠雲連屋澤國龍吟水
接天辟穀有方能寄否老夫愁鬢雪紛然

次韻荅諸葛用中

為憶君家書畫船夢魂長遶太湖邊干戈滿地無休
日萍梗他鄉又一年西北天高烟霧隔東南海闊水

雲連何當覓得桃源路雞犬相隨亦可仙

贈郭義仲

霜骨稜稜七尺軀昂然獨鶴睨群雛門前問字客携
酒船上乞詩人送珠山色隔簾雲縹緲梅花遶屋雪
糝糊別來歲晚遙相憶愁絕荒江夜月孤

寄萬壽寺愚隱智公

別後逢人問北山大開禪月古禪關江湖餅錫多依
倚文武衣冠數往還鐵馬解鞍祇樹下金魚換酒雨
華間平生不學融公嬾百轉圓機意自閑

劉龍洲墓在崑山慧聚寺後楊鐵厓偕應芳

及諸士友弔祭而作

目光如電氣橫秋北望龍沙萬里愁
匡主首陳天下養和戎深為國人羞
獨園埋骨黃金地上界脩文白玉樓
一代人豪今寂寞春風蘆葉自汀洲

袁子英過長洲寓舍云顧仲瑛寓吳江法喜寺日鈔佛書過午則觴詠不輟子英行附此

問訊

客來喜得平安信蕭寺樓居日掩扃
湖近浪搖窗影白地偏苔沒履痕青
群賢方結蓮花社小措猶鈔貝葉經
歲晚歸舟經甫里好尋漁父過寒汀

送照元明住白馬寺

老梅飛去跡猶靈七十二峯湖上青
且喜黃龍能說法無勞白馬更馱經
六時花雨狻猊座五色雲開翡翠屏
挹取寒泉煮山茗予將歲晚過禪扃

寄倪元鎮

時辟兵吳江

詩中有畫畫有詩輞川先生伯仲之襟懷
不著一事惱姓名惟恐多人知竹籜裁冠
晨沐髮蓮蓬洗硯晚臨池數年同飲淞江
水明月清風有所思

送慶德謙知州漕運之京兼簡陳子山學士

十三萬斛葑田珠一颿南風到直沽
天上變龍應為

喜海中蛟鱈近來無山林久臥頭垂白雨露重承紱
已朱寄語玉堂陳學士楚狂顛賴老東吳

簡淨慈寺顏長老

時江浙省丞相連失帖
木兒公以師禮事之

南屏樓閣照西湖湖上雲林勝畫圖丞相頻來談般
若老禪端坐結跏趺獨園重布黃金地雙樹新栽碧
玉株我欲稽山探禹穴木杯堪借渡江無

崑山陳伯康築亭山巔楊鐵厓扁曰玉山高
處且為賦詩邀予及郭義仲劉景儀殷孝伯
盧公武同賦

神仙中人鐵笛老為爾玉山雙眼青玉山高處拄手

板鐵笛醉時圍肉屏天生丹穴鳳為石東望黑洋鯤
出滇一代風流有如此名齊西蜀子雲亭

過震澤留別智愚隱蘇昌齡

淞江太湖春水生湖上白鷗尋舊盟遠公沽酒壯行
色坡老賦詩言別情燕子日長書屋靜柳花風颺鉤
絲輕相過不負青山約一櫂夷猶兩日程

和徐伯樞排悶

人生歲月能幾何有酒莫開金叵羅已看蓬鬢點蒼
雪何待桑田變白波三吳地卑風氣弱兩淮人雜語
音訛君詩到手座客滿擊節聽我玲瓏歌

劉旭齋過婁江客舍

正欲題詩寄草堂，遠勞移櫂過滄浪。十年同飲三江水，一笑相看兩鬢霜。田舍從軍鴉種麥，漕渠通海蟹輸芒。目前無限悲秋意，且與持杯送夕陽。

次韻浦玉田悼妾

目斷琴臺日莫雲，相如無復見文君。最憐機上迴文巧，更憶燈前教子勤。繡篋熊丸香尚在，綺窗鸞鏡影初分。江邨一月黃梅雨，誰為衣篝爇寶薰。

小至

森遭難滕州兩年而回

九年至日悲流落，一笑今朝醉醖醅。兒子歸來雙足

趺，老妻歡喜兩眉開。凍雲濃似金壺墨，飛雪輕於玉管灰。咫尺故園兵火隔，一枝誰寄臘前梅。

寄鮑仲孚提舉

風雨蕭蕭五月涼，階前書帶草應長。心傳千古文章印，名重諸公翰墨場。官舍看山間拄笏，齋居掃地靜焚香。野夫別後遙相憶，一榻青苔兩鬢霜。

除夕

姑蘇城外小湖邊，寂寞僧房借榻眠。詩藁寫成丁卯集，曆頭看盡甲寅年。中原蹀血人爭地，南國啼飢水拍天。起坐夜深如守歲，屋山風雪灑寒氈。

贈申仲義錄事

客來試問錢塘事冠蓋都非舊日人尚喜西湖堪種
柳安知東海欲揚塵手題玉祭登樓賦頭戴陶潛漉
酒巾如此江山如此客政須傾倒洞庭春

楊提學過千墩寓舍出示吳淞道中所作予
次韻酬之

酒濕宮袍逸興多馮夷擊鼓舞蛟鼉一江星月光搖
動八極風雲氣盪摩不學山陰回雪擢肯來林下訪
烟蘿陽春白雪知音少為我臨風一再歌

簡徐伯昂

淮海十年猶亂離吳淞一曲自栖遲門前纜送催租
吏籬下還吟采菊詩世事紛紛何日已襟懷落落少
人知移家喜近蘋花渚著我扁舟理釣絲

代簡及以中前往往山為妾人所沮既雪其
非復主法席予欲勸之謝事故
作有是

重攬凌霄絕頂秋歸來笠澤繫孤舟青山何處無黃
獨滄海相知有白鷗六合雲開天蕩蕩百川風靜水
漉漉試聽漁父滄浪曲江上蘆花亦點頭

荅馬公振見寄

芳草萋萋春復春桃花應笑未歸人數椽矮屋清溪



NATIONAL CENTRAL LIBRARY, TAIWAN, R.O.C.

曲一箇扁舟綠柳津且與往來乘款段從教圖畫上
麒麟老妻頗勝劉伶婦不惜春衣典酒頻

贈吳逸菴

先生頭髮烏如漆上壽明年八十三若有神仙傳祕
訣尚看孫子著朝冠燒香看畫湘簾靜留客題詩涿
酒酣堪笑狂夫長醉別出門更與阿戎談

張伯庸被圍吳城乘間得出詩以為賀

鴈書到手人方喜虎口脫身君已還難似上天行蜀
道險於中夜出秦關柳營鼓角邊聲遠菜子衣裳喜
色斑百斛葡萄新釀熟歌童莫放酒杯閑

過吳門

洪武元年早
春舟中作

無數雲梯未盡收髑髏如雪擁蘇州偽王守死空遺
臭降將偷生忍負羞鹿走荒臺千載後烏啼野樹五
更頭篙師也為愁無寐不待天明已放舟

洪武初聞顧仲瑛以召役入城嬰疾而歸尋
喜勿藥作此問訊

聞道龐公近入城還家風雨過清明催租人去詩仍
好市藥童歸病已輕尚喜竹林青筍出不嫌花徑紫
苔生路逢緇侶傳安信候問姑遲數日程

遣興和馬公振韻

馬圖毋怪出何遲，世事方如理亂絲。
蓮葉有巢龜已老，竹花無實鳳仍飢。
籬邊艇子供垂釣，林下樵童許看棋。
首着盤三丈，日山妻白首案齊眉。

顧仲瑛臨濠惠書詞甚忼慨，詩以代簡。

濠上人來書數行，開緘如對語。琅琅酒杯已辨，弓蛇悞藥杵無勞。玉兔將少待天公，舒老眼，賸收雲母束。歸裝舊家池館，花狼藉，春水依然綠漫塘。

董明府除夕惠炭

范叔寒多正不禁，烏薪意重比烏金。
賒來脫粟忙炊飯，留得焦桐好製琴。
環堵一龕春盎盎，麗譙三鼓夜

沈沈硯池冰，釋龍香暖寫我朝來抱膝吟。

煮茗軒

聚蚊金谷任葷羶，煮茗留人也自賢。
三百小團陽羨月，尋常新汲惠山泉。
星飛白石童敲火，烟出青林鶴上天。
午夢覺來湯欲沸，松風初響竹爐邊。

送秦宜中之京

丈夫不灑離別淚，杯酒聊發玲瓏歌。
黃楊戾閏亦已久，紅杏得春今正多。
出門手擲鐵拄杖，拾級足上金鑿坡。
鳳臺登眺寫佳致，千萬寄詩來薜蘿。

病中董知縣陳縣丞尹主簿枉顧詩以謝之

鳧鳥飛來野老家同僚先後佩飛霞共憐敗絮多生
蟲為問疑杯或飲蛇月俸分將官廩粟朋樽兼餉早
秋瓜相如四壁生光彩試握霜毫荅寵嘉

西野草堂為儲希崇教授作

南山虎去人無患西野堂成心更幽拄笏朝看山氣
爽讀書夜聽對聲秋賢人在座酒一斗奴輩當階橘
幾頭想像碧雞坊外路野梅官柳接林丘

金陵王儒珍知事兩紀之別重會于常年皆
八十喜各無恙又喜其別第失而復得把酒
賦詩為賀云

百年兩度塵生海二老重逢雪滿顛杖屨荒城寒食
後琴樽別業舊堂前桃花含笑似欲語燕子飛來真
可憐此日為君歌此曲兩蘇春早洗吳天

王次韻留別予亦再和送歸華亭

放舟東郭語長年喜得春風不放顛三月鶯花詩卷
裏五湖烟水柁樓前青衫司馬如今老白木長鏡祇
自憐歸到鳳山門不出北窗真是小壺天

次韻董明府兼贈丞簿

綠莎聽事灑清風四野遺黎集澤鴻佳政總堪書
國史丹心曾不愧天翁橫琴坐對中秋月援筆詞傾

百步洪僚佐粹然聯白壁有時來我滾西東

二月二日漫興

東風吹散社公雨南郭花開爛錦雲時俗喜逢迎富
日老夫羞作送窮文袂衣試著寒猶怯拄杖歸來酒
半醺為問驛橋楊柳樹送人多少去從軍

移居橫山四首

為愛橫山山水清山前築室小溪縈老夫枕石看雲
臥兒輩求田候雨耕古井寒泉龍有宅孤村夜月犬
無聲廿年老眼風塵暗猶喜如今見太平

三農間伍共烟霞數口清貧第一家瓦釜煮糜燒榸

葉布裘添絮著蘆花交游總覺鄉情好吟眺偏宜野
興賒不見羽人王八百浪傳仙井委丹砂

清夢常時繞薜蘿白頭今日此婆婆窗含風露秋容
淨簾卷林霏爽氣多浮世百年生處樂青山幾度醉
時歌莫愁猛獸藏林樾郡有劉昆必渡河
山北山南地盡耕人家祇欠讀書聲丹楓似我衰顏
醉黃鶴如仙瘦骨清吳越喜逢連歲稔朱陳多續舊
姻盟客來莫厭頻留宿新種梅花好月明

重過吳門二首

不謁閭丘謁虎丘幅巾藜杖興悠悠飄蕭白髮三千

丈來往青山八十秋寶地近曾為戰壘劍池今復屬
禪流老松知我題詩意也學生公石點頭

二千年外興亡事試為吳儂問老天西子皺眉真可
醜東門抉眼果何愆荒臺走鹿山花笑殘膾成魚野
史傳買得綠樽堪一醉且將湖水煮湖鮮

寄盧公武兼問殷孝伯安信

時殷為咸陽縣教官

憶言兩別去涂難喜得雲歸舊谷盤郡乘手揮狐史
筆齋居頭戴鹿皮冠草生林館皆書帶竹老谿園可
釣竿為問咸陽殷博士有無書尺報平安

孝伯省親而歸復赴任所過余言別索詩行

遠遊自是男兒志特立正當強仕年衣上密縫慈母
綫檐頭輕束廣文氎春秋三傳繼絕學畢郢諸生得
盛傳我亦有時飛夢去振衣同陟華山巔

寄熊元脩

五湖三泖一矚仙心骨俱清地更偏睡鳥燒香書屋
裏閑鷗結社釣磯邊絕憐芳草無塵土又喜黃楊閱
閏年熟客不來清晝永南山相對兩悠然

寄盧公武舍人

投老鶴谿垂釣緜遙憐鳳池掌絲綸鞞霜待漏朝會
早墨雲染翰詞頭新石麟自是天上物金薤散作人

間春尚須鼓吹振六籍蹴踏班馬追楊荀

次韻荅友人問巢居近况

百年有限耻求仙數口無飢賴薄田菰米熟來連日
雨菊花開到小春天方從易外窮義裁畫無復詩中泥
鄭箋客至酒杯時一舉開籠放鶴舞蹁躑

寄蔣山希物先楚蘭江二禪老

優鉢花開五百年連枝香徹九重天恩承雨露移金
闕語帶烟霞漱玉泉虎踞龍蟠多古跡燕來鴻去又
新年老夫懶著遊山屐空仰崔嵬夕照邊

書露筋廟碑後

斷臂孤兒事可悲露筋孀子死尤奇裙裾不受紅塵
污膏血寧充白鳥飢野燐照人魂斷處田家棲嫂睡
濃時瑤瑰香骨天應惜鐵石貞心世莫知宿草和烟
藶古塚幽花帶雨泣叢祠碑存米老春秋筆詩有歐
公絕妙詞風化實能裨禮俗天書宜為表門楣世間
多少青雲士不恤衣冠作夏姬

懷劉景儀

杏花春雨晴時別蒲蒲才風又颯然笳鼓新城嚴警
邏谿山幽館樂盤旋校書夜照青藜火煮茗時斟錫
谷泉近遇故交聞有信遠勞垂問念無氎龜巢久寓

黃天蕩龜竈今連白水田
自今犁鉏聊卒歲
可堪兵革更凶年
家居食指一百廿斗米
緡錢八九千
瑣瑣旅懷何足道
知君憐我似夔蛇

五言絕句

秋夜

莎雞動客愁
如泣復如語
何處覓秋聲
荒林暗疎雨

古意二首

愁人悲白髮
游子戀黃金
璧月虧還滿
姮娥夜夜心
皎皎雙明珠
將以奉君子
歲之三十年
一朝化為水

題畫

鶴從海上來
樓觀飛霞曉
玄圃四時春
香風動瑤草
嘉樹藹秋綠
疎篁含夕涼
石間蘿帶長
披拂紫苔香
落落長松樹
清風遠近聞
若人忘世慮
相對看秋雲
中秋過丹陽
歸真觀訪友人
孫伯昭羽士陳
天倪留宿山中
適諸葛用中亦至
登樓翫月
天倪藝沈水香
與用中鼓琴
一再行置酒談
譔驩如也
酒罷伯昭誦陳簡齋詩云
一涼恩到骨
四壁事多違
歎賞不已
因用此為韻
即景寫情人各賦絕句十首

我愛烟霞交來此間暇
日琴樽復吟嘯
此樂真第一

高秋圓月夜真館白雲鄉坐客酒微醉木犀風正涼
鶴來松樹下欲語竟忘言應笑乘軒者前時誤主恩
一雨洗吳天青山淨如掃登樓候月明清風喜先到
忘形方外交適意杯中物如此了吾生何勞鍊金骨
凶中無棘榛何往非樂地懷哉安樂翁不出時有四
回仙昔曾遊相傳著靈跡不見榴皮書惡詩誰疥壁
楚氛何模糊淮山盡憔悴不知天上人誰任世間事
青松生礪底叢桂老巖阿誰信崑崙圃春風雨露多
口角無芒刺腰間減帶圍吾衰人共笑復與世相違

感興

屈原投江死揚雄投閣生一時生死計千古是非名

憶長洲六友

吳逸庵

杭越古名州江山今臥遊桃花春酒熟誰與醉滄洲

熊元脩

空谷跂音少長安踊價增政須門不出孤坐寂如僧

趙朋南

柳暗葳書屋芹香洗硯池催租人去後應賦惜春詩

趙彥禮

舊客來雙燕佳兒戲八龍庭生書帶草門掩隱居松

趙執中

風雨思君子機雲屋兩頭遙憐華鄂下獨抱杞人憂

吳中行

本草添箋注焦桐對寶薰千墩一野老十日九思君

絕句二首

方竹過眉杖單紉折角巾眼前無長物方外一閒人
滿地綠陰靜南風清晝長草蔬留客飯筍席坐書床

六言

題畫

老樹骨立偃蹇秋山氣勢崔嵬閑却一江風月扁舟

罷釣歸來

簡錢士遠

一榻青苔對雪五湖春水流漸欲遣長須覓酒聊將
短札題詩

予死欲速埋素志也今偶得小丘於橫山之
陽窳而覽之庶它日藪可速矣倚我長鏡歌

以自適時洪武丙辰中秋後三日也

枯蟬蛻殼欲化老蠶作繭自纏一笑不拘風水六歲
姑待天年

阮孚著履未了劉伶荷鍤長隨便作松根糞土遠勝

兵前肉籩

七言絕句

簡趙君模

湘竹兜子蒼頭兒少湏雨晴邀客嬉
金斗城西芳草路水邊楊柳青離離

嘉定道中二首

黍熟潮田花鴨飛雨香秋浦
窮魚肥野翁織屨街頭賣日莫裏鹽沽酒歸
趁潮艇子若游龍潮落橫塘日下春
負郭人家星散住水邊多種木芙蓉

題春林雨意圖

前山後山雲氣濃欲雨不雨天無風
絕似去年兵草裏此時船過瀟湖東

丁亥歲旦徐達卿席上作

徐卿席上杼花酒笑語春風口角生
陰雨一冬晴可喜况聞周鄭復尋盟

李太白月夜汎舟

青蠅觸起脫鞞時飛燕嗔人鳳亦疑
杯酒佯狂江海上一此心惟有月明知

陳湖夜泊

平湖秋水清如鏡，照見潘郎兩鬢斑。
帶箭飛來何處，鴈一聲，哀怨入雲間。

觀僧舍浴佛有感

銀盤水浴紫金身，膜拜殷勤聚邑人。
周孔豈無初度日，諸生誰為薦溪蘋。

余患項癰，適兵後無藥可療，賦詩自釋

吮癰人在五侯家，市肆渾無藥可賒。
童子歸來貪睡去，竹爐吹火自煎茶。

愚隱師辭蘇州萬壽禪寺，將退居上海，寄詩為別，落句云一聲短笛滄江晚，收拾絲綸下

釣臺因次韻送之

一笛西風吹未了，滿船明月賦歸來。
闔閭城闕多塵土，不著纖毫落鏡臺。

寄徑山顏悅堂長老時退居崑山州城之南，其室曰城南小隱。

每憶城南隱者家，崑山石火徑山茶。
逢人與說無生語，塵拂拈來帶雨華。

雨晴

黃梅落盡雨初晴，客舍菁苔四壁生。
鉄礮打城聲動地，老妻猶訝是雷鳴。

傷秋

茅茨數家黃葉村霖雨一月溪水渾烏鴉種麥日未
暝猛虎下山人閉門

和宜興許主簿出郭見寄二首

離墨山前芳草多馬蹄曾此幾經過
困碑文字無人識風雨銷殘近若何
官事驅馳出郭頻谿山滿眼物皆春
竹姑不識山家味顯得新詩遺故人

書護國院昇公壁二首

大地叢林瓦礫場法幢扶起破天荒
木魚呼粥舖禪侶蔬筍香來八九霜

選佛場開金碧區雲蘿烟樹一塵無
客來會得安心法莫向江邊更折蘆

懷成都監倉趙執中三首

擲去任公舊釣竿龍墀拜命即之官
丈夫志在功名外蜀道行來自不難

八千里外芙蓉城四五月間鷓鴣聲
月俸支來賸沽酒莫遣閑愁取次生
公餘訪古碧雞祠官柳野梅皆可詩
我欲見詩知雅興如何黃耳到家遲

一
卷

龜巢摘真卷之三

國家圖書館, NATIONAL CENTRAL LIBRARY, TAIWAN, R.O.C.

